



ATASSUT

Steen Lyngø

UKA15/21

03.11.2015.

**Uunga siunnersuut: Qalerallit avaleraasartuullu avataasiorluni aalisarnermi pisarineqartut akitsuutaat pillugit Inatsisartut inatsisaata allanngortinneqarnera pillugu Inatsisartut inatsisaat nr. x, xXx 2015-imeersoq
(Aalisakkat ikerinnarsiortut ilaasa Tunumi pisarineqartut akitsuutaat)**

(Aningaasaqarnermut Aatsitassanullu Naalakkersuisoq)

2016-mi Aningaasanut inatsisissap isumaqatigiinniutigineqarneranut atatillugu Naalakkersuisut partiit tamaasa isumaqatigiinniarnermut aggersarsimavai. Tassungalu atatillugu Naalakkersuisut partiit tamaasa periarfississimavai 2016-mut aningaasanut inatsip qanoq isikkoqarnissaanut.

2016-mut aningaasanut inatsip imarpassuisa aamma ilagaat isertitatigut pissamaatit 100 millioniuunngilaartut pequtugalugit akitsuusersuisariaqalerneq. Akitsuusersorneqarsinnaasutut eqqartorneqartut ilaatigut tassaapput ikummatissat aamma neqit nunatta avataaniit tikisitat.

ATASSUT-mit pingaartissimavarput, akitsuutinut tunngatillugu aqqissutissanik eqqussiniarneq periarfissatut aatsaat atorneqassasoq allatigut periarfissarsinnaangikkaanni. ATASSUT-mit pingaartipparput, akitsuusersuineri suillertut isiginiarneqaaqassasut peqqinnangitsut aammalu pissuserisanik allanngortitsissutaasinnaasut periarfissat isiginiqqarnissaat.

Taamatuttaaq aamma ATASSUT-mut pingaaruteqarluinnarpoq, akitsuutit eqqunneqarneri innuttaasunut inuutissarsiornermullu equngasumik sunniuteqannginnissaat, assigiimilli tamanut sunniuteqarnissaa. Tamatumani pingaaruteqarpoq, kikkut tamarmik assigiimmik akisussaaffeqarlutillu pisinnaatitaaffeqarnissaat. Taamatut aamma ipput Inatsisartuni aaliangiiffigisassat oqimaannerusut.

Partiit Naalakkersuisooqatigiit akitsuutit pillugit isumaqatigiissuteqarsimapput, tassanilu isumaqatigiissummi – ATASSUT-ip iluarisimaagaanni – ikummatissanut neqinullu akitsuusersuiniarnerup isumaqatigiissummiit peerneqarsimanerat. ATASSUT-mit ikummatissanut neqinullu tikisitanut akitsuusersuinissaq akkerlerisimavaat, tamatumap kingunerissammagu innuttaasunut equngasumik eqquinissaq. Taakkunungami akitsuusersuinissaq pissakinnerit annertunerpaamik sunnissammatigit, akitsuutit taakku isertitat qanoq annertutigineri apequtaatinngit sunniuteqartussaassammata. Innuttaasummi nerisassanik pisariaqartitsinerat isertitat annertussusaat naapertorlugu allanngornaviangimmat.

Aamma ATASSUT-mit akkerlerisimavarput ikummatissanut akitsuusersuinissaq. Innuttaasummi tamarmik assigiimmik iniminnik kiassarneqarnissaq allatuulli pisariaqartitarimassuk. Ilumoorpoq Naalakkersuisut ikummatissamut akitsuusersuinissamut tunngavilersuutigisimammassuk naatsorsuutigineqarmat ikummatissap akiisa siunissami ima appartiginissaat naatsorsuutigineqartoq, akitsuusiinikkut qaffaaneq malunniutaagaarnaviangitsoq. ATASSUT-ip ikummatissat akitsuuserneqarnissaanut akkerliuneranut



tunngaviuvoq taava ikummatissamut aki appassappat kikkunnut tamanut iluaqutaasariaqartoq, ilimagineqartutullu taamaattoqassappat innuttaasunut pisisinnaassuseqarnerulernermik malitseqassaaq, kiassarnermut annikinnerusumik akiliisalernermigut. Ikummatissallu akiata apparnera aamma inuutissarsiutilinnut pitsaasumik sunniutigissavaa tunisassiornermi akit appasinneruleneri. Taamaasilluni umiatsiaararsorluni aalisartumut aamma tunisassiorfiit aningaasartuutikinnerulerneranik kinguneqassalluni. Taamaattumik ATASSUT-mit aklerlearput nunatta avataaniit neqit tikisitat aamma ikummatissat akitsuusersorneqarnissaat.

Taakku akitsuutit oqaluuserineqartut isumaqatigiinniarnermiit peerneqarmata, taava pisariaqalerpoq akitsuutit nutaat pilersissallugit tassalu annertugisassaangitsunut imaluunniit qaleralinnut tunisassiarineqarsimanngitsunut. Tamatup kingorna inuutissarsiutillit, KNAPK aamma Sulisitsisut sulisartullu kattuffiat SIK taamatut aaqqiiniarneq akertilersimavaat.

Kattuffiit pineqartut taama aaqqiiniarneq assortuinnanngilaat, kisiannili kinguneqartussamik aaqqiissutaasinnaasumik siunnersuuteqarsimapput allamik. Tassalu siunnersuutigisimallugu pissarititanut akitsuummik qalerallit tamarmik tunineqartut akitsuuserneqartalernissaat.

Taamatut aaqqiissuteqarsinnaaneq ATASSUT-mit pitsaanerpaatut periarfissatut isiginiarpaat akitsuusersuinissap pisariaqarluinnarnerani, tamanummi assigiimmik sunniuteqassammat aammalu naapertuilluarnerulluni. Taamaattumik ATASSUT-mit kattuffiit tusaaniarsimavagut taamaasillutalu naalakkersuisooqatit isumaqatigiissutsip allanngortinniarnissaanut isumaqatiginiarsimallugit, kattuffinniit siunnersuutigineqartoq atoqqullugu. Taamatullu suliniuteqarneq iluatsissimavoq.

Taamaattumik ATASSUT-mit Naalakkersuisut siunnersuutaanut taaseqataanaviangilaq annertugisassaangitsunut imaluunniit qaleralinnut tunisassiarineqarsimanngitsunut akitsuusersuinissamut siunnersuutaannut, Naalakkersuisulli kaammattussavagut aappassaannerinninnginnermi inatsisissatut siunnersuummut allannguutissatut siunnersuummik Naalakkersuisut saqqummiusseqqullugit.